

## ধনবাড়ী কলেজ ধ্বংস হবার উপক্রম

টাঙ্গাইল, ২৭ ডিসেম্বর (সংবাদদাতা)।—  
চরম অব্যবস্থার কারণে ছাত্রসংখ্যার দিক  
দিয়ে জেলার বৃহৎ শিক্ষা প্রতিষ্ঠান  
ধনবাড়ী কলেজ ধ্বংস হবার উপক্রম  
হয়েছে। বর্তমানে কলেজে কোন  
পরিচালনা পরিষদ নেই। অধ্যক্ষ এবং  
উপাধ্যক্ষের পদ শূন্য। এই শূন্যতার  
সুযোগে দু'একজন অধ্যাপক এবং  
কর্মচারীদের অবাধ দুর্নীতির ফলে  
কলেজের অচলাবস্থা চরমে উঠেছে।  
১৯৬৭ সালে উত্তর টাঙ্গাইলের গুরুত্বপূর্ণ  
জনপদ ধনবাড়ীতে প্রতিষ্ঠিত ধনবাড়ী  
কলেজের বর্তমান ছাত্র সংখ্যা প্রায় ৪  
হাজার। এ বছর এ কলেজ থেকে প্রায়  
১২শ' ছাত্র-ছাত্রী এইচএসসি ও ৯শ' ৫০  
জন ছাত্র-ছাত্রী বিএ ও বিকম পরীক্ষায়  
অংশ নেয়। এ বছর এইচএসসি প্রথম  
বর্ষে প্রায় ১ হাজার ছাত্র-ছাত্রী ভর্তি  
হয়েছে। ছাত্রসংখ্যা এত বেশী থাকলেও  
এখানে শিক্ষকের সংখ্যা খুবই কম।  
বিগত দু'বছর যাবৎ এ কলেজে অধ্যক্ষের  
পদ শূন্য রয়েছে। দু'বছর আগে জগন্নাথ  
সরকারী কলেজের অবসরপ্রাপ্ত শিক্ষক

জনাব বদরুজ্জামান ভূঁইয়াকে অধ্যক্ষ পদে  
নিয়োগ করা হয়। কিন্তু ঢাকা বিশ্ববিদ্যালয়  
কর্তৃপক্ষ এই নিয়োগকে অবৈধ ঘোষণা  
করে চিঠি দেন। কারণ, উক্ত অধ্যক্ষের  
বয়স ৬০ বছরেরও বেশী।

গত দুই বছরে ছাত্র বেতন এবং অন্যান্য  
খাত থেকে যে আয় হয়েছে তাতে এই  
কলেজে কমপক্ষে ১০ লাখ টাকা উদ্ধৃত  
থাকার কথা। কিন্তু দুর্নীতির কারণে  
কলেজ ফাঁপে টাকা নেই। শিক্ষকদের দুই  
মাসের বেতন বকেয়া পড়ে রয়েছে বলে  
জানা গেছে। গত আগস্ট মাসে কলেজের  
উপাধ্যক্ষের মৃত্যু হলে তার পদ শূন্য হয়।  
সেপ্টেম্বর মাসে কলেজ পরিচালনা  
পরিষদের মেয়াদ চলে গেছে। কিন্তু  
এখনও এডহক পরিচালনা পরিষদ গঠন  
করা হয়নি।

স্থানীয় জনসাধারণের পক্ষ থেকে ধনবাড়ী  
কলেজের দুর্নীতি বন্ধ এবং প্রশাসনিক  
অচলাবস্থা দূরীকরণের জন্য ঢাকা  
বিশ্ববিদ্যালয় কর্তৃপক্ষ এবং শিক্ষা  
বিভাগের উর্ধ্বতন কর্তৃপক্ষের নিকট  
আশু হস্তক্ষেপ কামনা করা হয়েছে।